

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- गृहमंत्री अमित शाह होरें आखेआ ऐ जे त्रै नमें अपराधिक कनूनें, मुल्खै च भलेयां अज्जै कल्लै आले अपराधिक न्यांह सरिस्ते दी बत्तपदरी करगंन। उपराज्यपाल मनोज सिन्हा होरें आखेआ जे नमें अपराधिक कनून समाज च न्यांह ते बरोबरी जकीनी करगंन।
- जनरल उपेन्द्र द्विवेदी होरें आखेआ जे सेना हालिया ते भविक्ख दिएं सब्बने चुनौतिएं कन्ने निबड़ने लेई भलेया तैआर ऐ।
- श्री अमरनाथ यात्रा दे पैहले त्रऊं दिनें च 50 ज्हार यात्रुएं पवित्र गुफा दे दर्शन कीते। 6 ज्हार 5 सौ श्रद्धाजुएं दा नमां जत्था अज्ज अगड़ी यात्रा लेई रवाना होआ।
- केन्द्री मंत्री डॉ. जितेन्द्र सिंह होरें आखेआ ऐ जे पिंशनी आए दे मलाजम बी राष्ट्र निर्माण च बरोबर दे भयाल न।
- जम्मू कश्मीर सैलसफा विभाग नै आईसीसी टी-20 विश्व कप जित्तने आली भारतीय टीम गी जित्त दे जशन दे इक हिस्से दे तौरा पर केन्द्र शासत प्रदेश औने दा साददा दित्ता ऐ।

<><><><><><>

New Laws

केन्द्रीय गृहमंत्री अमित शाह होरें आखेआ जे सोमवार पैहली जुलाई थमां लागू होए दे त्रै अपराधिक कनून मुल्खै च आधुनिक अपराधिक नयांह प्रणाली दी नुमायंदगी करगंन। इंदे कन्नै तौले न्यांह ते पीड़ितें दा हक जकीनी बनोग। उनें आखेआ जे अपराधिक न्यांह प्रणाली हुन पूरी चाल्ली स्वदेशी ऐ। एह गल्ल गृहमंत्री होरें नमीं दिल्ली च 3 अपराधिक कनूनें बारे मीडिया गी जानकारी दिंदे होई आक्खी। गृहमंत्री होरें आखेआ जे पैहले शड़े पुलस दे हक्कें दी राखी कीती जंदी ही, पर हुन पीड़ितें, शकैत करने आले दे हक्कें दी बी राखी होग। गृहमंत्री होरें आखेआ त्रै नमे कनूनें च महिलाएं ते बच्चें खलाफ अपराधें गी तरजीह दित्ती गई ऐ। शाह होरें दस्सेआ जे नमें कनूनें च भीड़ दी हिंसा खलाफ बी प्रावधान न।

शाह होरें आखेआ जे विपक्ष इनें कनूनें बारे गलत जानकारी फैला'रदा ऐ। उपराज्यपाल मनोज सिन्हा होरें आखेआ जे मुख्यै च लागू त्रऊं नमें अपराधिक कनूनें कनूनें सब्बने लेई न्यांह ते बरोबर जकीनी कीती जाई सकोग। कल श्रीनगर च पुलस मुख्यालय च आयोजित इक समारोह दरान संबोधत करदे होई उनें आखेआ जे एह त्रवै नमें कनून उपनिवेश बाद दिएं नेडिएं गी जोडी देंगन। उनें आखेआ संविधान नै म्हेशां न्यांह, बरोबरी, आजादी ते अखंडता दे सिद्धातें पर जोर पाया ऐ।

<><><><><><><>

Parliament

संसद दे दौनें सदनें च राष्ट्रपति द्रौपदी मुर्मू हुंदे अभिभाषण पर धन्नबाद प्रस्ताह पर चर्चा होई। लोकसभा च बीजेपी दे अनुराग सिंह ठाकुर होरें पिछले 10एं ब'रें च सरकार आस्सेआ बक्ख-बक्ख क्षेत्रें च कीती गेदिएं पैहलें दी सराहना कीती। उनें आखेआ, प्रधानमंत्री नरेन्द्र मोदी दे नेतृत्व आली सरकार नै अर्थबवस्था च बाद्धे ते लोकें दे कल्याण लेई केई गैई पुट्टियां। विपक्ष दे नेता राहुल गांधी होरें नीट मतेयानें च होई दिएं कथित बेजातगिएं, अग्निवीर योना, मणिपुर च अशांति, नोटबंदी, बधदी मेंहगाई ते करसानें दे मुद्दे पुट्टे। उंदे आस्सेआ इक टकोहदे समुदाय पर दित्ते गेदे ब्यान पर प्रधानमंत्री नरेन्द्र मोदी ते गृहमंत्री अमित शाह होरें ऐतराज पुट्टेआ। एहदे मगरा स्पीकर ओम बिरला होरें आखेआ जे संसद सदस्येंग ी बोलदे'लै संसद दी गरिमा दा ध्यान रखना लोडचदा ऐ। मगरा राहुल गांधी होरें सफाई दिंदे होई आखेआ जे उंदा ब्यान कुसै बशेष समुदाय खलाफ नेई, बीजेपी अल इशारा हा। राज्यसभा च जिसलै कल सदन किट्टा होआ तां अध्यक्ष जगदीप धनखड़ होरें नीट मतेयानें गी लेइयै विपक्ष दे सांसदे आस्सेआ पेश स्थगन प्रस्तावे गी मंजूर नेई कीता। मगरा दौनें सदनें दे सांझे इजलास च राष्ट्रपति हुंदे अभिभाषण पर धन्नबाद पस्ताव पर चर्चा होई। राज्यसभा च विपक्ष दे नेता मल्लिकार्जुन खरगे होरें आखेआ जे अभिभाषण च गरीब गुरबें, दलित ते अल्पसंख्यकें लेई किश बी नेई आखेआ गेआ।

<><><><><><><>

NTA

सरकार नै मतेयानें सरबंधी राष्ट्री अजेसी एनटीए दी प्रणाली गी होर तगड़ा करने लेई छात्रें ते माता-पिता थमां सुझाह मंगी भेजे न। इक सोशल मीडिया पोस्ट च सूचना ते प्रसारण मंत्रालय नै आखेआ ऐ जे डॉ. के. राधाकृष्णन हुंदी अध्यक्षता च बनाई गेदी इक उच्च स्तरीय कमेटी नै विद्यार्थिं ते माता-पिता थमां सुझाह, बचार ते प्रतिक्रिया मंगियां न।

मंत्रालय नै आखेआ जे ओ मतेयाने सरबंधी प्रक्रिया च सुधार, डाटा दी सुरक्षा च बेहतरी ते एनटीए दे कम्मकाज ते प्रणाली च सुधार बारे अपने सुझाह ते बचार भेजी सकदे न। विद्यार्थी ते माता-पिता 7 जुलाई तोड़ी अपने सुझाह ते बचार कमेटी गी भेजी सकदे न।

<><><><><><>

Army Chief

सेनाध्यक्ष जनरल उपेन्द्र द्विवेदी होरें पूर्वी लद्दाख च चीन कन्ने बन्ने गी लेइयै बने दे तनाजे दे चलदे कल आखेआ जे भारती सेना मुल्खै गी कुसै बी हालिया ते भविक्ख च दरपेश सुरक्षा चुनौतिएं कन्ने निबड़ने लेई पूरी चाल्ली तैआर ते समर्थ ऐ। सेना दी 13 लक्ख सशक्त नफरी दा पदभार सांभने दे 1 दिनै मगरा जनरल द्विवेदी होरें आखेआ सेना, नौसेना ते हवाई सेना बश्कार आपसी तालमेल बधाना उंदिएं प्राथमिकताएं चा इक रौहग। कल साउथ ब्लाक च रायसीना हिल्ज च गार्ड ऑफ ऑनर दे निरीक्षण मगरा मीडिया गी दित्ते गोदे ब्यान च उनें आखेआ जे सेना अनोखिएं व्यवहारिक चुनौतिएं कन्ने निबड़ा'रदी ऐ ते एह्दे लेई जरूरी ऐ जे सेना गी भलेयां अज्जै कल्लै आले थेआरें-असलें कन्ने लैस रखेआ जा।

<><><><><><>

India-Pak

भारत ते पाकिस्तान नै कल राजनयिक जरियै कन्ने इक दुए दी हिरासतै च नागरिक कैदिएं ते मछेरें दी सूचियां इक दुए गी सौंपियां। विदेश मंत्रालय नै आखेआ ऐ जे भारत ते पाकिस्तान नै 366 नागरिक कैदिएं ते 86 मछेरें दे नां सांझे कीते न। पाकिस्तान नै भारत दे 43 नागरिक कैदिएं ते 211 मछेरें दे नां सांझे कीते न। जेह्डे पाकिस्तान दी कैद च न ते मन्नेआ जा'रदा ऐ जे ओ भारतीय न। 2008 ब'रे च दौनें मुल्खें बश्कार होए दे दपक्खी समझौते दिएं बवस्थाएं मूजब हर ब'रे पैहली जनवरी ते पैहली जुलाई गी दवै मुल्ख इस जानकारी गी सांझा करदे न। भारत दी तरफा पाकिस्तान गी गजारश कीती गोई ऐ जे सब्बने भारतीयें ते मन्ने जा'रदे भारतीय नागरिक कैदिएं ते मछेरें दी सलामती सुरक्षा दा उच्च पूरा ख्याल रखना जकीनी बना जिच्चर रिहाई दे बाद ओ भारत गी नेई सौंपे जंदे।

<><><><><><>

Amarnath Yatra

जम्मू कश्मीर दे जम्मू स्थित भगवती नगर आले आधार शिविर थमां श्री अमरनाथ जी दी यात्रा दा 5मां जत्था घाटी लेई रवाना होआ। इस जत्थे च 6 ज्हार 537 श्रद्धालु शामिल हे। एह सब्बै श्रद्धालु 261 गड्डिङ्गं दे काफले च अज्ज बडलै रवाना होए। इंदे च 5 ज्हार 91 मर्द, इक ज्हार 102 महिलां, 19 बच्चे, 301 साधु, 24 साध्वियां शामिल हियां। कुल 6 ज्हार 537 श्रद्धालुं चा 2 ज्हार 106 बालटाल लेई ते 4 ज्हार 431 पहलगाम लेई रवाना होए।

<><><><><><><>

Jatinder Singh

कार्मिक, लोक शकैत ते पेंशन राज्य मंत्री डॉ. जितेन्द्र सिंह होरें कल नमीं दिल्ली च पारिवारिक पेंशन भोगिं दिं शकैतें दे नबटारे लेई इक बशेष अभियान शुरू कीता। शकैतें दे नपटारे लेई 100 दिनें दी कार्य योजना शुरू कीती गेदी ऐ। एहदे तैहत 1 महीने दा बशेष अभियान, 31 जुलाई तगर चलोग। डॉ. सिंह होरें आखेआ जे महिलाएं लेई पारिवारिक पेंशन योजना च कीते गेदे संशोधन सकारात्मक सेही होंदे न।

<><><><><><><>

Cricket Tourism

जम्मू कश्मीर दे सैलसफा विभाग नै इस ब'रे दे आईसीसी टी-20 विश्व कप जित्तने आली भारतीय टीम गी इस शानदार जित्त दे जश्न दे तौर पर केन्द्र शासत प्रदेश च औने दा साद्दा दित्ता ऐ। जंदे रोज भारत दी शानदार ते एतिहासक जित्त पर ममारकबाद दिंदे होई सैलसफा मैहकमे नै भारतीय टीम गी साद्दा दिंदे होई आखेआ ऐ जे '6अस भारतीय टीम गी जित्त दे जारी जश्ने दे इक हिस्से दे तौर पर जम्मू कश्मीर औने दा साद्दा दिन्ने आं ते भारतीय टीम दा सुआगत करना साढे लेई इक मानै आली गल्ल होग। मैहकमे नै इस साद्दे बारे जानकारी अपनी सोशल मीडिया प्लैटफार्म एक्स पर पोस्ट कीती ऐ। भारत नै 17एं ब'रे दे वक्फे दे बाद एह खताब एह खताब अपने नां कीता ऐ। 29 जून गी खेड्डे गेदे फाइनल मैच च भारत नै दक्खन अफ्रीका गी 7एं रजें कन्ने हराया हा।

<><><><><><><>

Green Manure-Basmati

राई-बाई मैहकमा जम्मू नै जम्मू प्रांतै दे आर.एस.पुरा दे बासमती चौलें गी आरगैनिक मतलब जैविक दर्जा देने लेई इक बड्डी परियोजना रंभी ऐ। इस पैहल दा मकसद पैहले बरते जाने आले रसैनी हैलें दी थाहर देसी हैल जिसी ग्रीन मैन्योर दे नां कन्नै बी जानेआ जंदा ऐ, दी बरतून गी बढावा देना ते रसैनी हैलें दे माड़े असर गी खत्म जां घट्ट करना ऐ। ओह्दी थाहर इस खित्ते च बरती जाने आली देसी हैल दी परम्परा गी शुरू करना ऐ। इस प्रोग्राम तैहत बासमती चौलें दी रड़ आले इलाके दे करसानें गी 120 क्विंटल धिआंचा बी उपलब्ध कराए गे न। एहदा मकसद ग्रीन मैन्योर यानि देसी हैल तैआर करने दी रिवायत गी परतियै शुरू करना ते इसी बढावा देना ऐ। जेहदे नै मिट्टी दी पैदावार-छमता ते मयार च सुधार होग ते जम्मू प्रांतै दे बासमती चौलें दी रड़ करने आले इलाके दी अपनी परानी पंछान बरकरार रौहग। इत्थूं दे बासमती चौलें दी देसी ढंगै नै उगाए गेदे पानी औरगैनिक उत्पाद दा दर्जा थ्होने कन्नै एह्दी पूरी दुनिया च मंग ते पंछान बधोग जेह्डी अपनी खुशबो ते सवाद लेई बक्खरी पंछान रखदी ऐ।

<><><><><><>

CO2 Capture

जम्मू दे महिला कालेज परेड दी “डिजाइन योर डिग्री” प्रोग्राम दी टीम नै नॉनितरिंग बाओ डायवस्टी फॉर एक्शन यानि कारवाई लेई जैविक बनसबन्नता पर तक्क रखना विषय पर लोआए गेदे इक अंतर्राष्ट्रीय सम्मेलन च शिरकत कीती। इस टीम दी कार्बन कैप्चर यानि CO2 कैप्चर प्रोजेक्ट लेई बडी मती सराहना कीती गई। 7 मिनबरी इस टीम च शामिल विद्यार्थिएं च तरुणप्रीत कौर, सहरिश अल्ताफ, सुकृति खजूरिया, तनवि शर्मा, तानिया, सनेहा मन्हास ते डॉ. गुरप्रीत कौर होरें कार्बन उत्सर्जन पर रोक लाने सरबंधी अपनी पैहल कन्नै, सब्बनें गी प्रभावत कीता। बायोर्टेक्नालजी दे एसिस्टेंट प्रोफेसर डॉ. गुरप्रीत कौर होरें इस विषय पर बेह्तरीन पोस्टर दा पुरस्कार हासल कीता।

<><><><><><>